

ФЕСТИВАЛЬ



Виктория КРАМОВА

24-тй мае Вотка ёросысь Юльскокой (Июльскокой) черкогуртысь библиотекалы Сергей Михалков писательлэсь нимзэ сётйзы. Ужрад ортчиз П. Чайковскийлы сйзем литературной фестиваль улсын.

19 библиотекаос С. Михалковлэсь нимзэ нулло. Соос интыяськемын Россиясь пöртэм каръёсын, Польшаын, Словакияын, Белоруссияын, Южной Осетияын. Та лыдзиськон юртъёс кылдыто С. Михалков нимо библиотекаослэсь огазеяськонзэс.

Юльскокойсь библиотека луиз С. Михалков нимо нырысетйез гурт лыдзетюрт. Библиотека пунктэмын вал 1910-тй арын Россиясь югдытйсь, книга поттйсь но меценат Флорентий Павленковлы лубса. Али со культура, ивор вöлмытонъя но книгаез утёнъя бадзым центр луэ. Библиотекае трос нылпиос ветло - соос Россиясь но элькуньсытмы литературная пöртэм конкурсёсы пырысько. 2017-тй арын Юльскокойсь библиотека «Удмурт элькуньсы устоез культура юрт» нимын пусъемян.

С. Михалков улэ библиотекаын



Библиотекалы тодмо писательлэсь нимзэ сётонлы сйзыса, Воткаысь «Юбилейный» культура дворецын ужрад ортчиз. Отчы пырыськызы С. Михалковлэн внукез - актёр, режисёр, продюсер Егор Кончаловский, Россиясь культура фондусь ужась Ольга Буцкая, «Детская литература» издательстволэн валтйсь редакторез Ирина Котунова, Россиясь ныл-

пиослэн книгаосыя кенешлэн директорез Людмила Чижова но Нижний Новгородсь, Калининградсь но Красноярсксь С. Михалков нимо библиотекаослэн кивалтйсьёсы. Озы ик вуылйзы Кун Кенешысь ялан ужась комиссиослэн кивалтйсьёсы Елена Дербилова но Владимир Варламов, Вотка ёрослэн йырыз Илья Прозоров но ёросысь Депутатъёслэн Кенешы-

Е. Кончаловский но И. Прозоров жечкылазы С. Михалковлы сйзем конкурсын вормисьёсты.

лэн төроез Михаил Назаров.

И. Прозоров тау кариз Е. Дербиловалы но В. Варламовлы - соос тыршемен, Юльскокойсь библиотекалы таё бадзым шуд усиз. В. Варламов Вотка ёрослэн йырыз вал, со вакытэ, 2016-тй арын, Юльскокой черкогуртын «Современник» культура но

спортъя дворец пунктэмын вал. Отын ик интыяськемын библиотека но. Е. Дербилова Юльскокойсь библиотекалы С. Михалковлэсь нимзэ сётны дэмлаз. Елена Анатольевна верамъя, малпанэз йылояз-пумозяз вуттытозь, 1 но жыны ар ортчиз. Со пусйиз: кунмы тыршыны кулэ, калык мед лыдзиськоз шуыса, угось книга калыкез дышетон удасын, нылпиосты бюджетонь бадзым инты басьтэ. Е. Дербилова пумиськоньын С. Михалковлэсь «Чистый лист» кылбурзэ лыдзиз.

Юльскокойсь калыкез жечкылаз Е. Кончаловский но.

- Писатель уг вуны, солэсь произведениосэ печатлало, лыдзо но нимзэ библиотекаослы сето ке, - вераз Е. Кончаловский. - Мон С. Михалковлэн нунокез лусько, соин мынам туж потэ, нылпиос, егитъёс солэсь произведениосэ лыдзиса мед будозы шуыса.

Е. Кончаловский но И. Прозоров жечкылазы С. Михалковлэн произведениосысытыз геройёслы сйзем конкурсын вормем пиналжесты.

Юльскокойсь библиотека 1 сюрс выль книгаен узырмиз. Таё кузьмез дасяз Россиясь культура фонд «Туннэ - нылпиос, чуказе - калык» проектэз улсын. ***

Быдзым муртъёслэн көкызы

Виктория КРАМОВА

28-тй куартолэзе Ижын йылпумъяськиз П. Чайковскийлы сйзем бадзым литературной фестиваль. Кузубай Гердлы сйзем синпелет дорын чузьяськызы Удмуртиысь писательёслэн но кылбурчиослэн чуръёсы.

Национальной библиотека К. Гердлэсь гожъямъёссэ калык пöлы вöлмытыны кема аръёс чөже тырше ни: радъясько адзытонъёс, шара лыдзонъёс, пумиськонъёс, ортчытэмын «Найди сундук Герда» квест. Шаерамы удмурт культуралэн но литературалэн будон но юнман сюресэз герзаськемын Кузубай Гердэн - соин литературной фестивалез, югдытйсьмес буре вайыса, йылпумъязы.

Нош мар огазея удмурт кылбурчиез но зуч композиторез? К. Гердлы но, П. Чайковскийлы но Удмурт шаер вордскем көкы луиз. Будытоязы соослэн лулазы-виразы пычаз инкуазьмылэн чеберез, пичи

дыразы кылэм веранъёс, котыразы чузьяськем кырзанъёс, крезьгуръёс. Со мылкыдъёс выжыяськемын произведениосазы. П. Чайковскийлэн «Времена года» произведениез вань, нош К. Гердлэн «Шуныт зор» дышетскон книгаез арлэн вакытёсызъя люкемын. Соин П. Чайковскийлэн куартолэзлы сйзем гурез чузьяськемъя Национальной библиотекаы Надежда Колотова лыдзиз удмурт кылбурчилэсь чуръёсэс.

Удмурт кылбурчиослэсь произведениосэс быдэстйзы Ижысь К. Герд нимо гимназиысь пиналжес. Со сяна, вордскем шаерлы, удмурт калыклы сйзем чуръёсты лыдзизы Удмурт кун университетсы Удмурт филология, финно-угроведения но журналистика институтысь студентъёс. Мылкыд карисьёс, микрофон доры потаса, К. Гердэз но П. Чайковскийез данъязы, удмурт но зуч кылын кылбуръёс лыдзизы.

Ужрадэ озы ик пырыськызы К. Герд нимо преми-

лэн лауреатъёсыз - писательёс но тодосчиос Александр Шкляев но Василий Ванюшев.

Александр Григорьевич верамъя, К. Гердэз но П. Чайковскийез огазе каре соослэн выль искусствозы, малы ке шуоно поэзия, литература, крезьгур, 3 вальёс выллем, чөшен ветло, адямилэсь сюлемзэ кенжыто. А. Шкляев лыдзиз К. Гердлэсь «Чагыр кышет» кылбурзэ. П. Чайковский, та крезьгур кад чузьяськись кылбурез кылысалыз ке, одно ик солы гур гожтысалыз, пе.

Василий Михайлович тодэ вайытйз: анай-атаез утем кад ик, вордиськем шаердэ, аслэсьтыд культурадэ утёно. П. Чайковский - дуннее вöлмем туж быдзым ним, фестивалъёс ортчытъям сяна, солэсь нимзэ литератураын но вылэ жутоно, чектиз тодосчи. В. Ванюшев лыдзиз аслэсьтыз П. Чайковскийлы сйзем кылбурзэ. Шумпотымон, бадзым литературной фестиваль, удмурт кылын чузьяськыса, йылпумъяськись шуыса. ***

Реклама



12-тй ИНВОЖОЕ
«КЫЗЬПУ АРАМА»

11:00

ГЕРБЕР

УДМУРТ КАЛЫК ШУЛДЫРЪЯСЬКОН



ПРОГРАММАЫН:

- вузм делегациослэн но кунослэн парадзы
- Ижарысь самодетельной удмурт ансамбльёслэн выступлениосы
- мастер-классъёс, калык шудонъёс, нылпи площадкаос
- «Задор арганчи» конкурс но «Трактористъёслэн» вожвыльясъёнызы
- Удмурт Элькуньсы кырзанъя но эктонъя «Италмас» академ ансамбльлэн но «Шулдыр жыт» эстрада ансамбльлэн бадзым концертсы
- удмурт дискотека

ВУНЫН ЛУЗ 2,7,9 НОМЕРО ТРАМВАЙЁСЫН «АВАНГАРДНАЯ» ДУГДЫЛОННИОЗЫ



12+



ОГРН 1021801159104 АУК «Государственный национальный театр УР»